

Ўзбекистон
Республикасининг
ҚОНУНИ



ЗАКОН
Республики
Узбекистан

«Келажак бунёдкори» медалини таъсис этиш тўғрисида

Қонунчилик палатаси томонидан 2017 йил 15 ноябрда
қабул қилинган
Сенат томонидан 2017 йил 20 декабрда
маъқулланган

1-модда. «Келажак бунёдкори» медали таъсис этилсин.

2-модда. «Келажак бунёдкори» медали тўғрисидаги низом тасдиқлансин (илова қилинади).

3-модда. «Келажак бунёдкори» медалининг тавсифи тасдиқлансин (илова қилинади).

4-модда. Ўзбекистон Республикасининг 1995 йил 22 декабрда қабул қилинган «Давлат мукофотлари тўғрисида»ги 176–1-сонли Қонунининг (Ўзбекистон Республикаси Олий Мажлисининг Ахборотномаси, 1995 йил, № 12, 266-модда; 1996 йил, № 5–6, 63-модда, № 9, 120-модда; 1998 йил, № 9, 163-модда; 2000 йил, № 7–8, 202-модда; 2003 йил, № 9–10, 140, 149-моддалар; 2005 йил, № 1, 18-модда; Ўзбекистон Республикаси Олий Мажлиси палаталарининг Ахборотномаси, 2007 йил, № 6, 250-модда; 2008 йил, № 4, 193-модда; 2012 йил, № 9/1, 241-модда; 2017 йил, № 9, 510-модда) **12-моддасига** қуйидаги қўшимча ва ўзгартиш киритилсин:

қуйидаги мазмундаги **бешинчи хатбоши** билан тўлдирилсин:

«Келажак бунёдкори» медали»;

бешинчи хатбоши олтинчи хатбоши деб ҳисоблансин.

5-модда. Ушбу Қонун расмий эълон қилинган кундан эътиборан кучга киради.

Ўзбекистон Республикасининг
Президенти



Ш. Мирзиёев

Тошкент шаҳри,
2017 йил 28 декабрь
№ УРҚ-451

Ўзбекистон Республикасининг
2017 йил 28 декабр даги
ЎРҚ-451-сонли Қонуни билан
ТАСДИҚЛАНГАН

**«Келажак бунёдкори» медали тўғрисидаги
НИЗОМ**

1. «Келажак бунёдкори» медали билан ватанпарварлик, фидойилик ва меҳнатсеварлик фазилатларини намоён этиб, халқ манфаатлари учун садоқат билан хизмат қилаётган, Ватанимизнинг халқаро майдондаги обрў-эътиборини юксалтиришга ва шон-шухратини оширишга муносиб ҳисса қўшаётган, мамлакатимиз ижтимоий-сиёсий ҳаётида фаоллиги ва ташаббускорлиги билан тенгдошларига ўрнатилган бўлаётган, шунингдек ўқишда ва меҳнат фаолиятида катта ютуқларга эришган, 14 ёшга тўлган ва 30 ёшдан ошмаган Ўзбекистон Республикаси фуқаролари мукофотланади.

«Келажак бунёдкори» медали билан Ўзбекистон Республикаси фуқароси бўлмаган шахслар ҳам мукофотланиши мумкин.

2. «Келажак бунёдкори» медали билан Ўзбекистон Республикаси Президенти мукофотлайди. Мукофотлаш тўғрисидаги фармон матбуотда ва бошқа оммавий ахборот воситаларида эълон қилинади.

3. «Келажак бунёдкори» медали билан мукофотлашга тақдим этиш, мукофотлаш, шунингдек уни топшириш «Давлат мукофотлари тўғрисида»ги Ўзбекистон Республикаси Қонунида назарда тутилган тартибда амалга оширилади.

4. «Келажак бунёдкори» медали билан мукофотланган шахслар энг кам иш ҳақининг ўн баравари миқдоридан бир йўла тўланган пул мукофоти олади ва қонун ҳужжатларида белгиланган имтиёزلардан фойдаланади.

5. «Келажак бунёдкори» медали кўкракнинг чап томонига тақилади.

6. «Келажак бунёдкори» медали билан вафотидан кейин мукофотланган тақдирда медаль, мукофотлаш тўғрисидаги ҳужжат ва бир йўла берилган пул мукофоти мукофотланган шахснинг оиласига топширилади.

Ўзбекистон Республикасининг
2017 йил 28 декабр даги
ЎРҚ-451-сонли Қонуни билан
ТАСДИҚЛАНГАН

«Келажак бунёдкори» медалининг ТАВСИФИ

«Келажак бунёдкори» медали дастлаб 0,5 микрон қалинликдаги никель, кейин эса 0,25 микрон қалинликдаги олтин билан қопланган мис қотишмасидан тайёрланади ва диаметри 34 миллиметрли доира шаклида бўлади.

Медалнинг қалинлиги – 2,2 миллиметр.

Медалнинг олд томонида, марказда, оқ фонда замонавий фан-техника тараққиёти тимсоли бўлган «тинчлик атомининг» рамзий тасвири, кўк рангдаги Ер шари, унинг меридианлари ва параллеллари, Ўзбекистон Республикасининг харитаси, шунингдек таянч рамзи бўлган икки қафт тасвири жойлашган.

Медалнинг юқори қисмида айлана бўйлаб яшил рангли лентага «KELAJAK BUNYODKORI» деган сўзлар ёзилган. Ёзув зарҳал рангда бўлиб, ҳарфларнинг баландлиги 2 миллиметрни ташкил этади.

Медалнинг пастки қисмида айлана бўйлаб иккита зайтун новдаси жойлашган, уларнинг туташган марказида яримой ва юлдузни ўз ичига олган, четлари зарҳал хошия билан ўралган кўк рангли мусамман тасвирланган. Мусамманнинг чап ва ўнг томонларида Ўзбекистон Республикасининг Давлат байроғи ранглиридаги ленталар тасвири акс эттирилган.

Медалнинг орқа томонида диаметри 21 миллиметр бўлган Ўзбекистон Республикасининг Давлат герби тасвирланган бўлиб, унинг пастки қисмида медаль рақами 3,5 миллиметр катталиқдаги ботик шрифт билан ёзилган.

Медалнинг олд ва орқа томонларининг четлари қабарик доира билан ўралган.

Медаль шойи лента билан қопланган беш қиррали қадағичга илмоқча ва ҳалқача ёрдамида туташтирилган.

Шойи лентанинг ўртасидан эни 7 миллиметрли оқ рангли йўл, унинг икки четидан эса тўқ кўк рангли энсиз чизиклар билан хошияланган, эни 2 миллиметрли иккита сарик рангли йўл ўтган. Шойи лентанинг чекка қисмлари бўйлаб эни 4 миллиметр бўлган кўк рангли йўл ўтган.

Қадағичнинг бўйи – 48 миллиметр, эни – 46 миллиметр.

Қадағичнинг орқа томонига медални кийимга тақиб қўйиш учун тўғноғич кўринишидаги мослама ўрнатилган.

